

Hubentud den Pa: Mercedes Abdul

Movecion

Pamela Flanegin:

"Mi deseo di mas grandi ta pa bira Juffrouw di school"

Seccion Hubentud den Movecion a entrevista Pamela Flanegin, e hobencita cu recientemente a participa den e certamen "Miss Flower International" na Miami, y cu a bin cu e bunita corona aki pa Aruba.

E entrevista a bay mas tanto riba su caracter, su estudio, su metanan pa futuro, y ki mensahe e tin pa nos hubentud. En corto el a referi na e certamen. Actualmente Pamela ta estudiante di Avond-Mavo, Examen Klas, na Hato, y den futuro e kier bira juffrouw di school. loke ta su deseo di mas grandi. Asina aki el a comenta:

"Ora mi caba school mi deseo ta pa bay Havo, y despues bay IPA pa bira Juffrouw di school. Mi ta kere cu e profesion di maestra tin bastante tarea dificil pa cumpli cune; no ta solamente duna les pero tambe aconseha e muchanan di nos tempo moderno, y yuda den nan formacion integral.

Mi ta kere cu e tarea ta dificil pasobra un maestro ta topa cu diferente sorto di mucha, diferente sorto di problema, y bo mester sa con pa guia nan. Como maestra mi lo mi kier siña muchanan acepta otro manera nan ta, sin discriminacion, y pa nan traha den grupo pa con fti cu otro, y alavez haci lesnan mas atractivo pa tur mucha comprende bon y haya estimulo pa siña".

SU BIDA DEN FAMILIA

Pamela ta un mucha di cas. Un hoben cu ta gusta e bida di hogar y cu ta stima su famia hopi. Su mehor amigo ta su mesun ruman. Asina aki e ta defini su caracter:

"Mi ta considera mi mes un tiki cabesura, bastante timido prome cu mi gara confianza cu un persona, pero mi ta gusta yuda hende y mi ta stima mucha, naturaleza (bestia, mata, y tur loke tin di haber cu ambiente)". Respet ta un balar hopi importante pa Pamela. E ta un



balor' cu mester prevalece riba tur cos.

"Respet pa bo mayornan, pa hende di mas edad cu bo, y naturalmente pa bo mes pasobra si bo no tin respet pa bo mes bo no por tine pa otro hende", ei a bisa.

Pamela su ruman homber ta su mehor amigo. Nan tin un bunita relacion y comunicacion cu otro.

"Mi no ta un hoben cu ta sali hopi, pero mas tanto mi ta na cas cu mi famia. Sinembargo, de vez en cuando mi ta gusta sali cu mi ruman bay cinema wak pelicula, y bay come den restaurant.

Mi tin un relacion masha bunita mes cu mi ruman homber cu tin 25 aña cu ken mi ta comparti masha hopi mes. Mi ta considere mi mehor amigo, semper e ta aconseha mi y nunca e ta laga mi na caya. Mi por bisa cu mi ta un hoben di cas".

HOBBIENAN

Tempo cu Pamela tabata chikito tabata practica fitness y ballet. Despues el a drenta Tai-kwonde, y tambe ta gusta monta cabay den su tempo liber.

"Loke mi mas a gusta ta ballet, pasobra e tin hopi disciplina y ta un actividad leuk pa mucha muher, unda bo ta siña

hasta elegancia.

Mi no ta den ballet mas awor, pero mi ta bayendo les di Tai-Kwonde, na Dakota, mi tambe mi ta practica fitness y monta cabay".

TOCANTE E CONCURSO

Tocante su experiencia na Merca, Pamela a conta lo siguiente:

"Mi experiencia durante e concurso aki ta inolvidable. Mi no tin nada di keha, tur hende a trata mi bon. Mi a cera conoci cu hobennan di diferente otro pais y otro cultura, algo cu ta hopi sano y positivo pa haci.

Entre e candidatanan nos tabata casi mescos cu amiga, nos tabata aconseha y yuda otro. Envidia no a haya espacio cerca nos, pero mas bien un bunita relacion di amistad. Tur e candidatanan tabata hopi interesa den mi pais Aruba. Mi a cera un amistad mas special cu Miss Peru y Miss Italia, cu tambe a sali prome y di dos finalista".

Segun Pamela un certamen asina ta un bunita experiencia pa tur mucha muher. Nan ta siña cosnan cu antes no tabata sa y ta haya chens di propaganda nan pais internacionalmente.

"Si den futuro Aruba lo bolbe

participa, lo mi aconseha un otro candidata prepara su mes intelectual y fisicamente, bon pa representa nos pais dignamente. Cumpli cu tur e normanan cu e organizadornan ta pone pa bo, y no laga nan na caya".

MILENIO NOBO

E expresion "tercer milenio" ta na moda. Na diferente manera tur pais, y tur ser humano mester prepara su mes pa drenta den siglo XXI. Kico Pamela su expectativa ta pa cu e milenio nobo?

"Pa prome mi ta desea pa

drenta e aña nobo cu ta bin cu hopi paz y felicidad, no den temporada di Pasco so y fin di aña, pero pa henter e aña cu ta nos dilanti.

Nos no mester lubida riba Dios cu ta e Creador di tur cos, y cu materialismo no ta tur cos den bida. Rico y pover nos tur ta mescos dilanti di Dios, y ohala nos pueblo yega Aña 2000 mas cerca di Dje y cu mas amor pa nos proximo".

SU MENSAHE

E mensahe di Pamela pa Aruba en general y nos hubentud en particular ta:

"Hobennan, scucha bo mayornan, nan ta hende cu experiencia cu ta stima boso y kier lo mehor pa boso. Keda afo for di droga y alcohol. Pone bo dilanti e meta di studia pa haya un profesion na prome lugar, y asina garantiza bo futuro.

En general, mi ta haya cu nos comunidad mester ta mas uni cu otro, y laga envidia un banda pasobra esey no ta yuda ningun hende.

Si nos tur ta traha hunto, Aruba ta bay mas dilanti, no solamente den turismo pero den tur desaroyo, pa nos pais cu ta di nos e ta!".

Pamela kier a desea pueblo di Aruba henter un Pasco y aña nobo feliz, yen di salud, prosperidad y bendicion di Dios.

